



12. aggusti 2011

UKA 2011/91

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni CO₂ –mik aniatitsinerup annikillisarnissaanut, silaannaallu avatagiisinut illersuisumik atorneqarnissaanut ileqqussanik, atuinissamullu innuttaasunik paasititsiniaanissanut naalakkersuisut sulissuteqaqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortat Knud Kristiansen aamma Siverth K. Heilmann, Atassut)

Tunngavilersuut:

Naalakkersuisup apeqquteqaammut § 37 nr. 2011-45-mut akissuteqarnerminni nassuiarpaa CO₂-mik aniatitsinerup annikillisarnissaata taassumalu qanoq anguneqarnissaanut Naalakkersuisut suliniuteqarnersut. Tunngaviumik ATASSUT-mit naammagisimaarparput nukissamik ataavartumik ingerlaqalersinnaanermut misissuinerit piorsaanerillu Naalakkersuisunit soqutigineqarlutik isiginiarneqarmata.

Nassuiaammittaaq takuneqarsinnaavoq missingersuummik sanasoqarsimasoq Kalaallit Nunaanut pisussaaffiliisussamik nunarsuup sinneranut siunissami silaannaap mimgutsitsinnngittumik atorneqarnissaanut isumaqatigiissusiornissamut. Isumaqatigiissutissami Kalaallit Nunaata CO₂-mik aniatitsinera 5%-imik annikillisarneqassasoq pisussaaffiliisaaq, isumaqatigiissutissamittaaq ilanngunneqarsimavoq qanoq isiornikkut annikillisaanissaq anguneqassanersoq, soorlu innuttaasut ulluinnarni nukissamik atuinermut ileqqusa allanngortissinnaanissaanut paasititsiniaanerit, taamaasilluni ulluinnarni pitsaanerumik silaannarmik atuilernissaq anguneqassammat. Isumaqatigiissutissarli atulersinneqarsimanngilaq Inatsisartuni suli taasissutigineqanngimmat.

ATASSUT-mit isumaqarpugut CO₂-mik aniatitsinerup annikillisarneratigut silaannaap pitsanngorsarnissaa pingaaruteqarluinnartoq. Tamannalu iluatsissappat pingaaruteqarpoq innuttaasut matumani ilanngunneqarnissaat paasisitsiniaanerit aqutugalugit. Inuiaqatigiinnut paasitinneqartariaqarpoq silaannaap allanngornera nunatsinnut, nunarsuullu sinneranut qanoq kinguneqarnersoq, innuttaasullu peqataanermikkut CO₂-mik aniatitsinermut qanoq annikillisaaqataasinnaanerat.

Pisortanut aningaasatigut allaffissornikkullu kingunerisassai:

Siunnersuut akuerineqarpat pisortanut aningaasatigut allaffissornikkullu kinguneqassaaq. ATASSUT-mit missigersorsimavarput suliap aallartinnissaanut ingerlanneqarnissaanullu allaffimmiumik ullup affaa sulisussamut aningaasat 250.000 kr. atorneqassasut tassani atortussat ilanngullugit. Saniatigut nutserisarnissanut aningaasartuutissat ilanngunneqassapput. Saniatiguttaaq radio-kut tv-kullu paasititsiniaanissanut aningaasartuuteqassaaq, taakkuli radio-kut tv-kullu paasititsiniaanissanut aningaasaliissutaareersunut tullerriaarinissanut ilanngunneqassapput.

Inuussutissarsiortunut aningaasaqarnikkut allaffissornikkullu kingunerisassai.

Inuussutissarsiortunut aningaasatigut allaffissornikkullu kinguneqarnissaa naatsorsuutigineqanngilaq.

Innuttaasunut aningaasaqarnikkut allaffissornikkullu kingunerisassai.

Innuttaasunut aningaasatigut allaffissornikkullu kinguneqassanngilaq.